

**Տ. ԱՆՈՒՇԱՎԱՆ ԵՊԻՍԿՈՊՈՍ ԺԱՄԿՈՅԱՆԻ ՔԱՐՈԶԸ՝
ԽՈՍՎԱԾ Ս. ԷԶՄԻԱԾՆԻ ՄԱՅՐ ՏԱՃԱՐՈՒՄ
ՄԱՏՈՒՑՎԱԾ ՍՈՒՐԲ ՊԱՏԱՐԱԳԻՆ
ՔԱՀԱՆԱՅԱԿԱՆ ՁԵՌՆԱԴՐՈՒԹՅԱՆ ԸՆԹԱՑՔՈՒՄ**
(3 դեկտեմբերի 2006 թ.)

*«Լոյծ զկօշիկս քո յոտից քոց, զի տեղիդ յո-
րում կաս դու ի դմա՝ երկիր սուրբ է»:*

(Ելք Գ 5)

Միրելի հոգևոր եղբայրներ, սիրելի նորած եղբայրներ և հավատացյալներ.

Աստուծո ռոգորմությամբ այսօր եկեղեցականության շարքերը համալրվեցին ևս չորս մշակներով, ովքեր տարիներ առաջ ոտք դնելով եկեղեցու շեմից ներս՝ ուխտ ա-
րեցին դառնալ աստվածային խոսքի մշակներ և սպասավորները մեր Սուրբ Եկեղե-
ցու և Ժողովրդի: Ահավասիկ ևս չորս նորած քահանա Հայրեր, ովքեր արձագանքե-
ցին Տիրոջ Խոսքին, կրթվեցին ճեմարանում, գորացրին իրենց հոգին այս խնկաբույր
կամարների ներքո և Հայոց Հայրապետի և ողջ հոգևորականության հայացքի ներքո
աճելով՝ հանձն առան քաղցրությամբ իրենց ուսերի վրա կրել Տիրոջ Սուրբ Խաչը և
ընթանալ Տիրոջ պատվիրաններով:

Այսօր փառք և գոհություն ենք տալիս Աստծուն, որ տեսլաշեն Միածնաեջ հրեշ-
տակներով լեցուն մեր Սուրբ Եկեղեցին շարունակում է ծնել լույսի որդիներ: Փառք
ենք տալիս Աստծուն, որ Սուրբ Հոգու շնորհագործ գործության բերկրանքը այսօր
պատել է և՛ երկնայիններին, և՛ երկրայիններին: Փառք և գոհություն Աստծուն, որ մեր
Ժողովրդին տալիս է ևս չորս մշակ: Փառք ենք տալիս Աստծուն, որ շնորհիվ հունձքի
առատության՝ շատ ու շատ մշակներ են պատրաստվում և տարեցտարի ավելի շա-
տանում:

Կոշիկներդ հանի՛ր քո ոտքերից, որովհետև այն վայրը, ուր կանգնած ես, սուրբ է:

Այս խոսքերը վստահաբար ծանոթ են մեզ բոլորիս: Աստվածային այս կանչն է, որ
մեզ բոլորիս իրարից տարբեր ժամանակներում բերել է այս սուրբ վայրը: Դարեր ա-
ռաջ աստվածային այս բառերը լսեց Մովսես մարգարեն, որը փորձում էր մոտենալ
Անկեզ մորենուն: Այս խոսքերն այսօր այս Սուրբ Սեղանից և նրա վրա ճառագող Լու-
սավորչի կանթեղից մեզ են ուղղված: Նայեցեք այնտեղ հովվի աչքերով, ինչպես Մով-
սեսն է նայում Անկեզ մորենուն, և այնտեղից կլսեք այս ձայնը. «Հանեցեք ձեր կոշիկ-
ները ձեր ոտքերից, որ մինչև այսօր քայլել են այս աշխարհի փոշիների մեջ, մաքրվեք
այս աշխարհի տիղմից, որովհետև այնտեղ, որտեղ որ դուք կանգնած եք, սուրբ եր-
կիր է, սուրբ հող է»:

Այսօր դուք բարձրացրիք ձեր ձեռքերը, հրաժարվեցիք այս աշխարհի լայն բաց-
ված ճանապարհներից և հավատարմությամբ ուխտ կնքեցիք քայլելու սրբության և
ազնվության, նվիրումի և ծառայության նեղ և փշոտ ճանապարհներով:

Միրելի նորած Հայրեր, աստվածային Խոսքի մշակներ լինելը լոկ խոսքով չի
սահմանափակվում, այն իր մեջ որքան ուրախություն ու քաղցրություն ունի, այնքան
էլ դառնություն ու դժվարություններ: Քրիստոսի առաքյալը դառնալը միայն այս պա-
հի կատարվածով չի սահմանափակվում և միայն օծում ստանալով չի որոշվում:

Դուք ձեր ողջ կյանքի և ծառայության ընթացքում և արդյունքում ձեր ծառայության պետք է դառնաք արժանի քարոզիչն ու մշակը, արժանի սպասավորը մեր Եկեղեցու և Ժողովրդի՝ արժանի կոչվելու իրական առաքյալը: Արդ, որովհետև խոսքս ուղղված է ձեզ, սիրելի նորած չայրեր, և այսօրվա գերահրաշ աղոթքներն էլ ձեզ համար են, որոնց շնորհառատ գործության ներքո նրանց ազդմամբ կոչվեցիք քահանայության, լրջորեն և իմաստությամբ նայեք նախ ինքներդ ձեզ, դիտեք ձեր կյանքը և տեսեք, թե ինչն է պատճառը ձեր կյանքի և կոչումի, թե ինչու բաժանվեցիք մարմնականից սեղանով, զգեստով, կոշիկով, գոտիով և բնակությամբ նմանվեցիք այն ճամփորդներին, ովքեր, հակառակ ճանապարհի երկարությանը, անձրևներին, քամիներին, դժվարություններին, ընթանում են իրենց ուղիով՝ հաղթելու մեծագույն հույսով և ակնկալիքով:

Այսօր ուրք դրեցիք կյանքի մի նոր հանգրվան ու ճանապարհ, որտեղ շատ են խոչընդոտները, որտեղ սաստիկ պատերազմ է աշխարհային կյանքի դժվարությունների և փորձությունների դեմ: Այսպիսի ճանապարհ նախ մեր Տերն անցավ և հաղթության օրինակը պարզեց մեզ, և քանի որ զինվոր կոչվեցիք, քաջությամբ պիտի կռվի ելնեք նախ ինքներդ ձեր դեմ՝ սպանելու ձեր մեջ ամեն տեսակ հեշտություն և ցանկասիրություն, ազահություն և ծուլություն, լուրջության դուռ դնելով ձեր բերաններին և Աստուծո խոսքով միայն բացելով, ապա պայքարելով ձեր հոտին վնաս հասցնող բազմաթիվ երևույթների դեմ: Կոշիկները հանեցեք ձեր ոտքերից, որովհետև այն վայրը, որտեղ դուք կանգնած եք, սուրբ է, որպեսզի չլինի, թե այս աշխարհի վրայի մտածումներով և փոշիներով մտնեք այս սուրբ տեղը և կանգնեք այս սուրբ տեղի վրա, որպեսզի չլինի, թե դառնաք անպիտան մշակներ:

Սիրելի նորած չայրեր, խոսքս տեղին եմ համարում ավարտել խոսքով Անձնացու հետևյալ խրատական տողերով. «Քանզի հովիվ կոչվեցիք, որպեսզի Տիրոջ Ժողովուրդը հովվեք, բանավոր վայրերում արածեցնեք, բանական գառներին խնամեք, որպեսզի միշտ խոսքով վարդապետեք և նույնը գործով կատարեք՝ սեփական անձի մաքրության բոլոր բարիքների օրինակը տալով հոտին և նախանձախնդրությամբ, բարի նախանձով հորդորելով բոլորին, քանզի ում շատ գիտություն տրվեց, նրանից շատ առաքինություններ են պահանջվում, և ում տրվեց բանական հոտի վրա վերակացություն, նրանից առավել ևս կպահանջվի ուղիղ վարք և Ժողովրդի խնամակալություն: Ջանացեք ապրել և ծառայել Տիրոջ օրհնյալ պատվիրաններով և մտածեք միայն աստվածային ճանապարհների մասին, թե որտեղից սկսվեց և որտեղ է ավարտվում: Սկիզբը բարի է, որովհետև Լույս Հորից է, և ավարտն էլ վերստին Նրա մոտ է»:

Թող Բարձրյալն Աստված շնորհով լեցնի մեր Եկեղեցին և նորած մեր քահանա հայրերին այժմ և հավիտյանս հավիտենից. Ամեն: